

## Tiago ombopara va'ekue Tiago ombopara va'ekue

Kova'e kuaxia rupi Jesus ryvy Tiago omongoeta hemimbo'e kuery. Ha'e rami vy ijayvu Jesus re jajeroviaa jaexa uka aguã mba'emo jajapoa py.

Mba'eta “Irmão kuery, nhande-Senhor Jesus Cristo hexakãmba va'e re pejerovia vy peteĩ regua rive joegui peavyuve eme” (2.1), “nda'evei pejejou porã rei aguã, neĩ anhetẽ va'e rovai pendepu aguã guive” (3.14). Ha'e rami 'rãgue py Nhanderuetea gui arandu ou va'e re 'rã nhandekuai. Mba'eta “yvate guigua 'arandua ma jypy'i nhandeapo 'rã nhanderekko ky'a e'ŷ aguã rami, ha'e gui nanhandevai rive-rivei 'rã, mborayvu re nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhanderekko porã merami rivei 'rã guive” (3.17). Ha'e rami vy 'rãe jaexa uka Jesus re jajeroviaa.

### *Oxarura reve ijayvu aguã omboypyague*

<sup>1</sup> Xee Tiago ma Nhanderuete ha'e Senhor Jesus Cristo rembiguai aiko.\* Axarura doze regua opa rupi pendekuai va'e pe.

*Nhanderekko a'ãa rire iporã va'e oiko va'erã re ijayvua*

<sup>2</sup> Irmão kuery, opa marã penderekko a'ãa rã pevy'a ete ke,

---

\* **1:1** Atos 15.13; Gálatas 1.19, 2.9,12

<sup>3</sup> mba'eta peikuaa pejeroviaa a'ãarã oiko va'e peaxapa ma rire peĩ atãve 'rãa.

<sup>4</sup> Ha'e gui peĩ atãa tojapopa ojapo 'rã va'ekue, peẽ kuery opa mba'e py pendereko porã aguã, peteïve henda py iporã va'e oata e'ŷ re.\*

### *Nhane'arandurã re jajerure aguã re ijayvua*

<sup>5</sup> Ha'e gui amongue 'arandurã oata ramo tojerure Nhanderuete pe. Ha'e ramo ome'ẽ 'rã, mba'eta ivai e'ŷ re 'rã mba'emo ome'ẽ pavẽ pe.

<sup>6</sup> Ha'e rami avi ojeroviaa rupi tojerure, peteïve henda py toĩeme oexa'ã reia.\* Mba'eta ndojerovia porãi va'e ma yai yvytu ogueraa rupi rei omomy-momyĩ va'e rami ikuai.

<sup>7</sup> Ha'e ramigua avakue toexa'ãeme Senhor gui mba'emo ojopy aguã re,

<sup>8</sup> mba'eta mokoĩ rami rei oikuua va'e vy mamo rã oikoa rupi nai'arandui rei 'rã.

### *Mba'emo ko yvy regua okanhymba 'rãa re ijayvua*

<sup>9</sup> Irmão kuery yvyi'igueve va'e ma toguerovy'a Nhanderueteomboyvatea re.

<sup>10</sup> Ha'e rã oguerekopa va'e ma omo'yvyi'ia re toguerovy'a, mba'eta jai poty rami rive 'rã okanhy.\*

<sup>11</sup> Mba'eta kuaray ojope ratã reve ou ramo jai ipiru rã ipoty okuipa 'rã. Jaexa rã iporãague ndojekuaavei 'rã. Ha'e rami ae oguerekopa va'e voi okanhy 'rã mba'emo re opena rupive.

### *Jejavya re ijayvua*

\* **1:4** Romanos 5.3,4; 1 Pedro 4.12-14

\* **1:6** Mateus 21.22

\* **1:10** 1 Pedro 1.24,25

**12** Ovy'a ete 'rã avakue oeko a'ãa rã oĩ atã reve ogueropo'aka va'e, mba'eta oaxapa rire coroa-rã oupity 'rã tekove. Ha'e va'e ma guembiayvu kuery pe Senhor ome'ẽ aguã re ijayvu.

**13** Ha'e rami teĩ avave rei omoangecko rã “Nhan-deruete xemoangeko” te'i eme. Mba'eta Nhan-deruete ma mba'emo vai pe onhemoangecko uka va'e'ŷ, neĩ nanhanemoangekoi 'rã mava'eve rei.

**14** Ha'e rami 'rãgue py peteĩ-teĩ nhande ae jaipotapa reia py nhanhemoangeko uka. Ha'e nunga py ae nhanhembotavy uka ha'e jajeity uka.

**15** Mba'eta jaipotapa reia ma nhandejee nhamoĩ rire nhanemoingo 'rã jajejavu aguã rami. Ha'e gui jajejavya ma opaa py ojapo 'rã nhamano aguã rami.

### *Iporã va'e me'ẽa re ijayvua*

**16** Irmão kuery xerembiayvu, pejekore eme.

**17** Mba'eta yvate gui meme ou mba'emo porã iky'a e'ŷ va'e, Nhanderuete hendy va'e moingoare va'e ae ombou.\* Ixupe ma jipoi amboae rami rei imoingoarã, neĩ kuaray'ã rami rive herovaarã.

**18** Mba'eta ha'e ae oipotaa rami vy gua'y kueryrã nhanemoingo raka'e ayvu anhetẽ va'e rupi, hemimoingo kuery ha'e javi gui nhande ranhe ixupagua nhandekuai aguã.

### *Nhanderuete ayvu rupi nhandekuai ete aguã re ijayvua*

**19** Irmão kuery xerembiayvu, ha'e nunga peikuaapa ae ma. Ha'e rami avi peteĩ-teĩ penhea'ã penembo'ea rã pejapyxaka porã aguã. Ha'e rã pendeayvu voi eme, neĩ pendevai voi eme guive.

---

\* **1:17** 2 Pedro 1,3,4

**20** Mba'eta avakue ivaia py ndoexa ukai 'rã Nhan-deruete guigua teko porã.\*

**21** Ha'e nunga rupi pendejegui pemboi nda'evei va'e ha'e teko vai pendere oĩ va'e ha'e javi. Ha'e penhemoyvyi'i reve pendu ete ayvu porã pendere omoĩ mbyre, mba'eta pendereraa jepe aguã ipo'aka va'e.

**22** Ha'e rami vy ayvu ojapo ete va'e peiko, oendu rive va'e'ŷ, peẽ ae pejekore e'ŷ aguã.\*

**23** Mba'eta ayvu oendu rive vy ha'e rupi ndoikoi va'e ma epéko re peteĩ ava ojexa rive va'e rami,

**24** mba'eta ojexa ma vy ojepe'a vyve marã rami pa ojekuaa ague re hexaraipa vyvoi 'rã.

**25** Ha'e rã lei opa mba'e gui nhanemoingo porã va'e re amongue oikuua pota ete ha'e ojapoa rupi oĩ atã va'e ma omoingo porãa ete 'rã mba'emo ojapoa rupi rei, mba'eta oendu rive va'e'ŷ, ojapo ete va'e oiko rã.

**26** Ha'e rã amongue ojeupe “Nhanderuete pegua” he'i teĩ oayvu py ndojejokoi va'e ma opy'a py ae ojekore, ha'e Nhanderuete pe merami rive oiko.

**27** Ha'e gui Nhanderuete renonde nhanderekoy'a e'ŷa ha'e anhetẽ rupi nhandekuai vy jaipou 'rã tyre'ŷ ha'e imeve'ŷ va'e kuery ojexavai rã, ha'e jajejoko 'rã vyv regua reko rupi nhanderekoy'a gui.

## 2

*Peteĩ regua rive joegui jayvu ve'ŷ aguã re ijayvua*

\* **1:20** Romanos 12.17-21; Efésios 4.26-32 \* **1:22** Mateus 7.24-27;

1 João 2.3-6

<sup>1</sup> Irmão kuery, nhande-Senhor Jesus Cristo hexakāmba va'e re pejerovia vy peteī regua rive joegui peayvuve eme.\*

<sup>2</sup> Xapy'a rei penhembo'eaty py peteī ava oike 'rā kuā regua ouro guigua ha'e onhemonde porā reve. Ha'e gui amboae ju oike avi 'rā iporiaukue'i, ao ymague py rive onhemonde va'e.

<sup>3</sup> Xapy'a rei onhemonde porā va'e peroryxe vy "Apy ke eguapy tenda iporāve va'e py" peje 'rā. Ha'e rā iporiaukue'i pe ma "Ndee, epu'ã he'amy upe py, ha'e'ŷ vy eguapy apy xepy renda yvýry" peje 'rā.

<sup>4</sup> Ha'e ramia py peteī regua rive'ŷ ri ty'y joegui peayvuve? Ha'eve'ŷa rami e'ŷ ri ty'y joeko re peikuua pota?

<sup>5</sup> Irmão kuery xerembiaiyvu, pendu ke. Ko yvy regua kuery "Iporiaukue'i" he'ia va'e regua e'ŷ teve Nhanderuete oiporavo ojerovia ete aguā? Ha'e kuery va'e regua pe e'ŷ teve oupity uka opo'akaa? Mba'eta guembiaiyvu kuery ha'e javi peguarā oguerekoo.

<sup>6</sup> Ha'e rā peē kuery ma napemboetei pekuapy iporiaukue'i. Ha'e rami avi oguerekopa rei va'e kuery e'ŷ ri ty'y penemoingo axy rei? Ha'e kuery e'ŷ ri ty'y penemboayvua aguā katy pendereraa va'e?

<sup>7</sup> Ha'e kuery e'ŷ ri ty'y tery porā pendere omoī mbyre re ijayvu rei va'e?

<sup>8</sup> Lei re ipara oĩ va'e "Reayvu 'rā neirū ndee ae rejeayvua rami" he'ia pejapopa ri vy ha'evea rami pendekuai.\*

---

\* **2:1** 1 Timóteo 5.21    \* **2:8** Levítico 19.18

<sup>9</sup> Ha'e rã peteĩ regua rive joegui peayuve ri vy pejejavy. Lei rupi e'ŷ pendekuai vy heko vai va'e peypyta.

<sup>10</sup> Mba'eta lei re oĩ va'e ha'e javi amongue ojapopa teĩ peteĩ henda'i py mba'e ho'a vy ha'e javi py onhemboeko ky'a.

<sup>11</sup> Mba'eta “Ndetavy eme” he'i va'ekue ae “Ejojuka eme” he'i avi. Ha'e ramo nandetavy rei va'eri rejojuka vy lei rovai rupi reiko.\*

<sup>12</sup> Ha'e nunga rupi pendeayyu ha'e pendekuai ke jaa jepe aguã regua lei rupi, mba'eta ha'e va'e rupi ae 'rã nhandere oikuaa potaa.

<sup>13</sup> Mba'eta nanhanhomboaxyi rire nhanemboaxy re'ŷ ju 'rã nhanembopaga. Ha'e rã nhomboaxy va'ekue ma nhombopagaa aguã ára py ipo'aka 'rã.

### *Jajeroviaa jaexa uka aguã re ijayvua*

<sup>14</sup> Irmão kuery, mba'erã tu ovare amongue “Xee ajerovia” he'i teĩ ojeroviaa mba'eve py ndoexa ukai ramo? Ha'e rami ojeroviaa rupi nda'u oo jepe 'rã?

<sup>15</sup> Xapy'a rei peteĩ irmão e'ŷ vy irmã nda'ijaoi ha'e tembi'u ndoguererekoi rã

<sup>16</sup> peẽ kuery regua pexa vy onheovã aguã napeme'ëi e'ŷ re “Peiko porã ke, penhemonde ha'e pekaru”, peje 'rã. Mba'erã tu ovare 'rã ha'e rami pendeayvua?

<sup>17</sup> Ha'e rami ae avi jajeroviaa voi mba'eve py nda-jaexa ukai ri ramo omanogue rami rive opyta, hexa ukaarã noĩ avi rã.\*

\* **2:11**Êxodo 20.13-14, Deuteronômio 5.17-18  
3.8-14; Atos 26.20

\* **2:17** Lucas

**18** Xapy'a rei amongue aipoe'i'rā: "Peteĩ ojerovia 'rā, ha'e rā amboae ma onhea'ã 'rā mba'emo ojapoa rupi", he'i 'rā. Exa uka ha'vy rejeroviaa mba'emo rejapo e'ŷ re. Ha'e rā xee ma aexa uka 'rā ajeroviaa mba'emo ajapoa py.

**19** Ndee rerovia teve Nhanderuete peteĩ'i oikoa? Ha'evea rami reikuua teĩ anha kuery voi ha'e rami oguerovia oryryipa reve.

**20** Ha'e gui ava hi'arandu e'ŷ va'e, reikuua porāxe teve jajeroviaa ndajaexa ukai ramo mba'everā ndovareia?

**21** Nhaneramoĩ Abraão nda'u ojerovia etea oexa uka e'ŷ re ri omboeko porāa raka'e? Mba'eta altar áry gua'y Isaque ome'ẽ aguã rami oiko.

**22** Ma'ẽ, ojerovia ete ha'e oexa uka guive, mba'eta mba'emo ojapoa py oexa uka ojerovia etea.

**23** Ha'e rami vy ae ojeupity ipara re oĩ va'e: "Abraão ojerovia Nhanderuete re. Ha'e ramo ojeroviaa re omoĩ tekō porā" he'iague. Ipara avi oiny: "Ixupe 'Nhanderuete irũ 'ea."\*

**24** Ha'e rami rire jajeroviaa jaexa uka ramo mae 'rā nhanemboeko porāa, jajeroviaa re rive'ŷ.

**25** Raabe itavy rei va'ekue voi ojeroviaa oexa uka ramo omboeko porāa raka'e. Mba'eta ha'e va'e ma oikuua pota aguã ombou pyre kuery omovaẽ raka'e, ha'e gui amboae tape rupi ju omondouka guive.

**26** Mba'eta nhanenhe'ẽ reve'ŷ vy nhanderete omanogue itui. Ha'e rami ae avi jajeroviaa voi xapy'a rei mba'eve py jaexa uka e'ŷ ramo omanogue ae avi opyta.

\* **2:23** Gênesis 15.6

**3***Nhaneapekū nhanemboeko vaia re ijayvua*

<sup>1</sup> Irmão kuery, nda'evei peẽ kuery heta peiko aguã porombo'ea, mba'eta jaikuaa porombo'ea kuery rekokue re oikuuaa potaa poyive 'rãa.

<sup>2</sup> Mba'eta nhande kuery ha'e javive 'rã jajeity uka opa mba'e py. Oayvu py ndojejavyi va'e ma opa mba'e py 'rã heko porã, ha'e guete regua ha'e javi guive ojoko kuaa.

<sup>3</sup> Kavaju re minha ijuru xã nhamoõ 'rã jaipotaa rami jareko aguã. Ha'e rami vy hete ha'e javi 'rã jaaxea rupi jaraa.

<sup>4</sup> Peikuuaa pota avi kanoã guaxu ikuai va'e re. Ha'e nunga ma tuvixa ete, ha'e hexe yvytu oipeju atã teĩ imbojeapaa kyrĩ'i va'e py imboguataa kuery ogueraaxea katy rei 'rã ogueraa.

<sup>5</sup> Ha'e rami ae avi nhaneapekū, mba'eta nhanderete regua kyrĩ'i va'eri onhemboyvate reia rupi 'rã ijayvu, peteĩ tata ravijukue'i ka'aguy tuvixa va'e omoendypaa rami avi.

<sup>6</sup> Mba'eta nhaneapekū voi tata ramigua, ha'e nhanderete regua ikuai va'e mbyte py oĩ opa marãgua teko vai rexâ ukaarã. Nhanemboeko ky'apa 'rã. Tata ogue'ŷ va'e omoendy rire oapy avi 'rã jaikoa ha'e javi.

<sup>7</sup> Mba'eta mymba ikuai va'e minha nhamomãxo kuaa 'rã: guyra, yvy rupi otyryry va'e ha'e yy rupigua ha'e javive regua ma nhamomãxo va'e mème.

<sup>8</sup> Ha'e rã nhaneapekū ma avave rei ndojoko kuaai 'rã. Teko vai moingoa ojoko pyrã e'ŷ oĩ, ha'e veneno rami jojuka 'rã guive.

<sup>9</sup> Nhaneapekũ py jaroayvu porã 'rã Senhor Nhan-deruete. Ha'e va'e py ae ju 'rã nhandeayvu vai avakue Nhanderuete ojee rami omoingo va'ekue re.

<sup>10</sup> Nhandejuru peteĩ'i va'eri ayvu porã ha'e ayvu vai rupi ijayvu. Irmão kuery, ha'e nunga ma nda'evei.\*

<sup>11</sup> Yvu peteĩ'i oĩ va'e gui nda'u oẽ 'rã yy porã ha'e iro va'e avi?

<sup>12</sup> Irmão kuery, figo rembypy gui nda'u oiko 'rã azeitona? Ha'e rami e'ŷ vy uva'y gui nda'u oiko 'rã figo? Ha'e rami ae avi peteĩ yvu gui noẽi 'rã yy he'ẽ ro ha'e iporã va'e.

### *'Arandua yvate guigua re ijayvua*

<sup>13</sup> Peẽ kuery va'e regua mava'e nda'u hi'arandu ha'e oikuaapa va'e pendekuai? Pene'arandua pexa uka ha'vy pendevai reia rupi e'ŷ, ha'evea rami anho pendekuaia py.

<sup>14</sup> Ha'e rã xapy'a rei pendepy'a re joe napendea'e reia ha'e peẽ ranhexea oĩ ramo nda'evei pejejou porã rei aguã, neĩ anhetẽ va'e rovai pendeapu aguã guive.

<sup>15</sup> Ha'e ramigua pexa uka va'e ma yvate guigua 'arandua e'ŷ. Ha'e ramigua ma yvy regua, mymba kuery oendu va'e ramigua rive, anha guigua ae.

<sup>16</sup> Mba'eta joe nda'ija'eí ha'e ha'e ranhexe va'e ikuiaia py oĩ avi 'rã joo rami e'ŷ-e'ŷ ikuai va'e ha'e opa marãgua teko vai.

<sup>17</sup> Ha'e rã yvate guigua 'arandua ma jypy'i nhandeapo 'rã nhanderekó ky'a e'ŷ aguã rami, ha'e gui nanhandevai rive-rivei 'rã, mborayvu re 'rã nhandekuai, ha'eve vai'i va'e 'rã jaiko, ha'e opa

---

\* **3:10** Efésios 4.29

mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhanderekō porã merami rivei 'rã guive.\*

<sup>18</sup> Mba'eta peteĩ rami nhomoingoa kuery ma oma'etõ va'e rami avi peteĩ rami nhomoingoague rupi ojou 'rã heko porã va'e.

## 4

### *Joguero'a reia re ijayvua*

<sup>1</sup> Magui tu ou joe pepu'ã ha'e pejoguero'a reixeia? Pendep'yapý py mba'emo re nda'eveivea pendu va'e gui e'ý teve ou?\*

<sup>2</sup> Mba'eta mba'emo peipota teĩ ndapejoui vy pejukaxe. Mba'emo re nda'eveive peiko teĩ ndapejoui vy pejoguero'a rei ha'e joe pepu'ãa rupi pendekuai. Mba'eve ndapejoui mba'eta ndapejerurei.

<sup>3</sup> Pejerure vy voi ndapejopyi, mba'eta ha'eve'ýa ramigua re pejerure, peẽ ae peipotaa rami pendekuaise vy.

<sup>4</sup> Nhanderuete pe merami rive pendekuai va'e, ndapeikuaai ri ty'y ko yvy regua re peo vy Nhanderuete rovaigua pepytaa? Mba'eta ko yvy regua re ooxe va'e rei Nhanderuete rovaigua oiko.

<sup>5</sup> Tyrã pa pexa'ã ipara re oĩa oaxa rive 'rãa re? Mba'eta "Nhendere Nhanderuete Onhe'ẽ omoĩ va'ekue oipota hexe anho jaa", he'i va'ekue.

---

\* **3:17** Gálatas 5.19-26 \* **4:1** Tiago 3.14-16

**6** Ha'e rami teĩ nhanemboaxyve ju 'rã, mba'eta aipoe'i avi: "Nhanderuete opu'ã 'rã onhemboyvate rei va'e re, ha'e rã onhemo'yvyi'i va'e ma omboaxy 'rã."\*

**7** Ha'e nunga rupi penhemo'yvyi'i ke Nhanderuete oipotaa rami. Ha'e rã anha pe ma pejeity uka eme. Ha'e ramo ojava 'rã pendegui.

**8** Penhemboja ke Nhanderuete re. Ha'e ramo ha'e ju onhemboja 'rã peẽ kuery re. Pejejavya va'e, peiky'a'o uka ke pendepo. Mokoĩ rupi rei pendepy'a va'e, peiky'a'o uka pendepy'a.

**9** Pendu ke penhemboaxya, ha'e rami vy peneraxẽ ha'e pejae'o. Penderory rei 'rãgue py pendepy'a vai, pevy'a rei 'rãgue py pendeporiau.

**10** Penhemo'yvyi'i ke Senhor renonde. Ha'e ramo penemboyvate ju 'rã.

### *Joe nhandeayvu rei e'ŷ aguã re ijayvua*

**11** Irmão kuery, pendeayvvu rei eme joe. Mba'eta irmão kuery re ijayvvu rei, e'ŷ vy oikuua pota rei va'e ma lei re voi ijayvvu ha'e oikuua pota rei. Ha'e gui lei re peikuua pota rei vy lei rupi ve'ŷ pendekuai, ha'e rã lei re peikuua pota reia rupi rive.

**12** Mba'eta peteĩ'i oiko lei mbouare ha'e joe oikuua pota va'erã. Ha'e va'e ma jogueraa jepe ha'e nhomokanhy aguã ipo'aka va'e. Ha'e rã ndee, marã ramigua tu reiko, neirũ kuery re reikuua pota rei aguâ?\*

### *Tenonde oiko va'erã ndajaikuaaia re ijayvua*

\* **4:6** Provérbios 3.34    \* **4:12** Mateus 7.1-5; Lucas 6.37; Romanos 2.1-3; 1 Coríntios 4.5

<sup>13</sup> Peẽ kuery va'e regua “Kova'e ára, e'ŷ vy ko'ẽ rã roo 'rã tetã re. Peteĩ ma'etŷ re 'rã roiko ha'e py. Mba'emo romboekoviaa rupi rojoupa 'rã”, peje. Ha'e ramo pejapyxaka porã pota ke aŷ.

<sup>14</sup> Mba'eta peẽ ndapeikuaai neĩ ko'ẽ rã mba'e pa oiko 'rãa voi.\* Marã ramigua tu peikovea? Mba'eta yvyxí xapy'a'i ojekuaa, ha'e gui are'ŷ'i re okanhy va'e rami peiko.

<sup>15</sup> Ha'e rami 'râgue py “Senhor oipota ramo roikove, ha'e rojapo 'rã ha'e nunga”, peje aguã ha'eveve.

<sup>16</sup> Ha'e rami teĩ aŷ ma mba'emo tuvixa va'e pejapo aguã re pendeayvua rupi penhemboyvate rei. Ha'e rami nhanhemboyvatea ha'e javi ma teko vai.

<sup>17</sup> Ha'e nunga rupi iporã va'e ojapo aguã oikuaa teĩ ndojapoi va'e ma ojejavý.

## 5

*Ojeupe guarã rive ojou pyre Nhanderuete omomba aguã re ijayvua*

<sup>1</sup> Perekopa rei va'e kuery, pejapyxaka ke aŷ. Pejae'o ha'e pendepy'a vai ke, mba'eta penembojexavaiarã ou.\*

<sup>2</sup> Mba'emo perekva'e ma hu'ũmba 'rã, vixo ho'upa 'rã pendeao,

<sup>3</sup> ha'e ouro, prata perekva'e voi opa 'rã iky'apa vy. Iky'akue pavẽ oexa vy oikuaa 'rã napene'aranduia. Ha'e nunga ma tata rami 'rã ombovaipa pendero'o. Opaa ára py teĩ penemba'e rei-reirã rive pemono'õ.

---

\* **4:14** Lucas 12.15-21    \* **5:1** 1 Timóteo 6.9,10

<sup>4</sup> Ma'ẽ, ombo'eapo va'e kuery pe napeme'ẽi penhotõ va'ekue omono'õague repy, pekorepa rei rire ojapukai okuapy. Ha'e kuery ojapukaia ma Senhor Ixonدارo reta va'e oendua peve onhendu.

<sup>5</sup> Perekopa va'ekue ko yvy re, pevy'aa rupi rive pendekuai. Penemombaa ára py teĩ penekuraxõ py voi penhemongyra rive.

<sup>6</sup> Heko porã va'e kuery ma pendere ha'e kuery nopus'ãi teĩ pembopaga uka, ha'e pejuka uka guive.

### *Jajapura rei e'ŷ aguã re ijayvua*

<sup>7</sup> Ha'e nunga rupi irmão kuery, Senhor ndoui teria ja pejapura rei eme. Ombo'eapo va'e voi ojapura e'ŷ re oarõ 'rã okuapy oky jypy'igua ha'e opa vygua ho'a ramo onhotõ va'ekue hi'a porã aguã.

<sup>8</sup> Peẽ voi pejapura rei eme. Penembaraete ke penekuraxõ py, mba'eta namombyryvei ma Senhor ou aguã.

<sup>9</sup> Irmão kuery, pendeayvu eme joe, penembopaga e'ŷ aguã. Ma'ẽ, nhandere oikuaa pota va'erã ovaẽ ma okẽ py.

<sup>10</sup> Irmão kuery, peiko axy teĩ pejapura eme, profeta kuery Senhor rery rupi ijayvu va'ekue ikuaiague rami avi.

<sup>11</sup> Amongue ojapura e'ŷ re mba'emo ogueropo'aka ramo jaikuaa ov'y'a 'rãa. Mba'eta pendu ma Jó teko axy ogueropo'akaague, peikuua avi opaa py Senhor omoingo porãague, opa mba'e py nhanem-boaxy ha'e nhanderayvu va'e vy.\*

### *Jaura e'ŷ aguã, ha'e jajerure aguã re ijayvua*

---

\* **5:11** Jó 2.10; 42.10-17

**12** Ha'e gui irmão kuery, opa mba'e gui yvateve va'e ma po rami: Peura eme yva re, yvy re, neĩ amboae nunga re rei. Ha'e rami 'rāgue py "Tá" peje aguã py "Tá" peje, ha'e "Any" peje aguã py "Any" peje, penembopagaa e'ŷ aguã.\*

**13** Peẽ kuery mbyte ikuai teve ojexavai va'e? Tojerure ha'vy Nhanderuete pe. Ikuai teve ov'y'a va'e? Toporaei ha'vy.\*

**14** Penembyte ikuai teve imba'eaxy va'e? Toenoĩ ha'vy igreja re opena va'e kuery, ha'e va'e kuery Senhor rery rupi azeite oikyty reve ojerure aguã.

**15** Ha'e gui ojeroviaa rupi ojerure ramo imba'eaxy va'e okuera 'rā, Senhor ae omopu'ã ju 'rā. Ojejavague oĩ ramo ombogue 'rā guive.

**16** Ha'e nunga rupi peteĩ-teĩ pe pemombe'u pejejavague, ha'e jomeme pejerure pekuera aguã. Heko porã va'e ojerurea ma ipo'aka vaipa 'rā.

**17** Elias ma nhande ramigua ae oiko raka'e, nhande rami guive onhenhandu va'e. Ha'e va'e ma onhea'ãa rupi ojerure raka'e yvy áry oky e'ŷ aguã. Ha'e ramo mboapy ma'etŷ raxa peve nda'okyi.

**18** Ha'e gui ojerure ju ramo oky ou yva gui, ha'e ramo yvy gui oiko mba'emo aju.

**19** Irmão kuery, xapy'a rei peẽ kuery regua anhetê va'e gui ojepe'a rã amongue ogueru jevy ramo

**20** peikuua pota pova'e re: Ojejavvy va'e teko vai rupi oikoague gui amongue ogueru ju vy inhe'ẽ ogueraa jepe omano aguã gui, ojejavague heta teĩ

\* **5:12** Mateus 5.33-37    \* **5:13** Romanos 12.15

Tiago 5:20

xv

Tiago 5:20

ombogue uka vy.\*

---

\* **5:20** Mateus 18.15; Gálatas 6.1,2; 1 Pedro 4.8; Judas 22,23

## **Nhanderuete ayvu iky'a e'ŷ va'e New Testament in Guarani, Mbyá**

copyright © 2004 Wycliffe Bible Translators, Inc.

Language: Mbyá Guarani (Guaraní, Mbyá)

Translation by: Wycliffe Bible Translators, Inc.

### **Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

### **The New Testament**

in Guarani, Mbyá

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
3309fa3b-7590-5ae9-b829-5df4ddfbf957